



QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM

Die Iovis 10. Martij.

M. NICOLAO RICHARD, Doctore Medico, Præfide.

An vita nullis Medicinæ legibus adstricta brevior?

I.

AB unione animæ habemus quòd vita, cælesti dono, fruamur, & permansione calidi cum humido quòd diu; hæc utraque qualitas in singulis viventibus excellens nunquam excedit, nec temperamentum æquo pondere libratum quæras. Attamen nec copiâ nimîâ redundare debet humor qui calorem obrundat, nec suprà modum exuberare calor qui ad humoris absorptionem citò festinet: Sed quò æquiori perfusione coerint, eò seriùs animal fati vices subit; hinc homo præcæteris horum laudabiliorem nactus misturam, fœliciùs vitæ suæ pensâ tractat, & tardiori pede calcitrat lethifores: Contrà bos & equus, inter has vivificas qualitates non tam æquabili sancito fœdere cum staturâ procetior, citiùs dissolvuntur. Calor ille vitæ opifex non cum humore omni bene cohæret ac fociatur, sed ejus præsertim conjunctiōne teneri amat qui pinguis est, ac viscosus, suique fovendi capax, aqueum verò refugit, nec nisi ægrè sustinet, sic longioris ævi quæ oleum & refinam fundunt arbores, brevioris verò pisces quibus tenue & aqueum est humidum: At, crudele fatum! quod vitam efficit, eandem destruit; calor quo vivimus, igneam prorsùs naturam redolens, humidum sensim depeculatur ac depascit, sibi que ipsi molitur ruinam, nec si hæc ad interitum causa sufficeret, præstò est altera quæ illum ac-

celerare haud paulò plurimùm solet, inevitabilis excrementorum proventus; hæc duplex ingenita nobis mortis causa, quas si effugere omnino non licet, licet tamen aliquatenus differre, ut cujus artis sit id præstare leges non secuti, frustra de brevitate vitæ conqueramur.

I I.

HOMO primâ ætate calidissimus & humidissimus, postremâ sit frigidissimus & siccissimus; illa, infantia dicitur, quâ nativo humore delibuta membra mollia sunt, ductilia, & in omnem partem flexibilia: hæc, senectus, quâ ob siccitatem adeò redduntur rigida & contracta, ut vix moveantur absque dolore; jurè dicitur misera quæ facit infirmum corpus, privat omnibus voluptatibus, nec procul abest à morte. Inter hæc duas ætates aliæ intercedunt quæ caloris & humidi mutatione definiri solent; calor in infantulo ab ergastulis matris mox erumpente licet intensissimus, tamen proprio humore revinctus blandè micat, necdum vires suas in apertum exerit, at paulatim illum sorbens, nescius sibi moliri exitium, luculentius effulget, scintillat, rutilat, & in dies acuitur, siccitate limâ ejus accedente: Hinc aliquantulùm uslo humore, qui ante præpeti cursu huc & illuc oberrabat sine lege, in se colligitur, latius emanante flammâ depressâ, tum viget animus, floretque mens, ut sit splendore sicco nihil illustrius, unde heroës & ingenio excellentes melancholici. Interim tandiu vita non staret, nec ultra septimum diem excurreret, nisi in decedentis humidi locum novum accederet ex alimento; alimentum prorsus nullum confici integrè atque omnino potest, ex quo peregrinæ & infociabilis materiæ congestio fit, quæ inania locorum perreptans calorem inibi repositum, atque cubantem hebetat, vitæque cursum frangit, morborum omni colluvie inde manante. Alimentum potus comitatur, continuò spirandus aër, motus, quies, somnus, vigilia, excreta, retenta, & animi pathemata, sunt res à quibus immunis vita esse non potest, hæc vi suâ in nos agunt, vitæque principia pariter alterant; quod si his ita probè noris uti, ut lapsum quod erit humidum refarcieris altero tolerabilis conditionis, & excrementorum auctioni posueris moras, causis internecionem nostram admolientibus nonnihil obstites.

I I I.

MEDICINA omnium artium præstantissima est, cujus præcæteris firma sunt præcepta; inter ejus partes *vires à nobilior audit*, hæc rerum quibus vita tenetur cuique pro natura congruentem usum decernit, ejus ni legibus pareas incassum occurrere tentas causis interitus, illum potiùs accersis, quas sæpè qui spernit, inscius sequitur, iisque gravia damna arcet quæ aliàs esset afflicendus. Nullius adeò stabilis, constansque valetudo, ut à levioribus erratis aliquid non patiatur mali; sanitatis magna latitudo est; perfectè sanus nemo statim ægrotat, sed sensim minùs exquisitè sanus redditur, sic quæ actio actutini non

cernitur læsa, tamen paulatim deficit. Quidam addicti consuetudini huic uni obtemperandum putant, sed frustra, nisi prius illam ars probaverit: Ex malarum rerum assiduo usu id tantum commodi nanciscimur, ut minore incommodo his postmodum utamur, sic sub fallacis familiaritatis larvâ mala tegitur indoles, quæ statim occasione datâ nos fiducia nimium facilis arguit.

I V.

AD caloris nativi symmetriam conservandam magna vis est æris; purus quidem illum gratiosè recreat irroratque, quem impurus atque putrescens corrumpit: sic qui fervet impensius, aut ad extremum rigescit, gravi ipsi nocumento est, illo affatim resolvitur, vanescitque in tenues auras, hoc addensatur propriisque suffocatur in laribus. Nec minor quàm æris cibi & potus habenda ratio; qui se cibis ingurgitat, non se, sed suam ipse perniciem alit; ciborum ingluvie calor atteritur, excrementorum festinanter adauctâ congerie: Verumtamen exactâ ad unguem diartâ macerare corpus ut vacet impuris humoribus, desipientis signum est; ventriculus non fruens alimento debito, à circumjacentibus partibus saniem quandam biliosam pellicit, ex quâ non potest fieri sanguis laudabilis in corde, qui arterias validè agitet. Qui se excrementis liberare student, utantur cibis qui sint boni succi, facilisque coctionis; an piscibus omnino abstinendum; Credat Iudæus Apella, non ego; quo tempore mediocri ac refrigerante opus est victu, his selectis ac debite præparatis nihil præstantius, vere calido humido, sanguine exundante, horum usus salubris. Pro potu vinum largius sumptum omnibus incommodat, hoc in obruto pectore non potest læta viridisque germinare virtus, solum ipso turgidulus ac onustus venter luxuriosè despumat in libidines, nec dubium eo decurtari vitam eius fautore humido confertim abrepto; ut corpus melius habeat se se, in mense ad vomitum vino proluere, Arabis enorme commentum; nemini tamen ex ephebis excedenti non proficuum magnæque frugi est, id dilutum plus vel minus pro temperamentorum & temporum anni varietate, senibus præsertim nato humore penè exutis & inopiâ caloris algentibus, utrâque qualitate egregiè succurrit; querulorum melancholicorum unica medela.

V.

PLURES occidit gula, quàm gladius; impurum corpus quò magis nutrit, magis lædis; labor cibum præcedat moderatus, seu cui meta sit anhelitus alteratio, quo spirituum promptiore factò decursu referentur meatus, forasque elidantur excrementa; illum quies excipiat. Non minus ad incoluitatem animalis vigilia & somnus sibi debent succedere, illa digerit, hic coquit, digestionis amica lux est, nox coctioni commodat, quo pacto diu vigilandum, noctu dormiendum quousque appareant signa peractæ coctionis, ventriculi levitas, ructuum absentia, & novi roboris accessio, ultrâ si pergas, vitam tuâ

culpâ facis breviorē. Venus extra⁴ pubertatis annos omnibus convenit moderata, quam nec dolor nec languor consequitur, à somno præsertim; ne coctio perturbetur, cruditasque gignatur; semen, residuum illud glutinis quo partes aluntur, effusio à natura destinatum, si retinetur plus æquò, putret sitque venenum, optimâ indole in pessimam conversâ; neque tamen id effutiendum temerè, nè breve diluendum sit gaudium longis lachrymis, ex uno infesto coitu mille malis sobolescentibus; multi, ut spumantis libidinis acres devitent morsus, se se exanimant, atque interimunt restrictiore victu, vis tu ab his immunis esse, ne loca clausa otiosus incolas. Hinc *diomedes* Stoicorum procul exulet, homini non est cor ferreum, gaudium & spes sunt ita naturæ familiares, & amici motus, ut his jucundè refocilletur natus calor, totiusque corporis melior ac florentior eurescat habitus; adeò nequiter & flagitiosè dictum, quod qui medicè vivit, miserè vivit, cum id ars medica præster, ut productiorem non modò, sed & ærumna omni & languore liberam vitam agamus, qui summus felicitatis est apex.

Ergo vita nullis Medicina legibus adstricta brevior.

Proponebat Luteriæ CLAUDIUS GVERIN,
Parisinus, A. R. S. H. M. DC. LXVII.

PARISIIS,

Ex Typographia FRANCISCI MUGUET, Regis ac
Illustris. Archiepiscopi Paris. Typographi.